

**Atuarfik pillugu inatsisartut peqqussutaata allanngortinneqarneranik
Inatsisartut peqqussutissaattut siunnersuut.** (Inatsisitigut tunngavigisat pillugit
aalajangersakkat)

Nalinginnaasumik nassuiaatit

Inatsisartut 2002-mi upernaakkut ataatsimiinnermi atuarfik pillugu peqqussut nutaaq
(atuarfik pillugu inatsisartut peqqussutaat nr. 8, 21. maj 2002-meersoq) akueraat.

Tamatuma kingorna siunnersuummi akuerineqartumi kukkunerit marluk
paasineqarput.

1. § 18, imm. 4-mi inatsisitigut tunngavigisat pillugit aalajangersagaqannginnera.

Siunnersuutip aappassaaneerpeqarnerata kingorna
aappassaaneerpeqarnissaani siunnersuut aappassaaneerpeqarneranilu
allannguutit akuerineqartut katitinneqarput. Taamatut katitinneqarnerannut
atatillugu siunnersuummi § 18, imm. 4-mi inatsisitigut tunngavigisat pillugit
aalajangersagaq siunnersuutip qallunaatoortaani kukkusumik peerneqarpoq.
Taamaattumik siunnersuutip matuma siunertaraa peqqussutip
kalaallisoortaata qallunaatoortaatalu imminnut naapertuuttunngortinnissaat.
Tamatumunnga peqatigitillugu siunertaavoq qulakkiissallugu atuartup
atuarnerminik pissarsiaqarnerseq pillugu naliliinissamut naalakkersuisut
malittarisassiornissaannut inatsisitigut tunngavissaqarnissaat.

2. Meeqqat atuarfianni sunngiffimmi sammisassaqtitsineq pillugu nalunaarutip
nr. 14-ip, 29. maj 1995-meersup kukkusumik atorunnaarsinneqarnera

Siunnersuummi akuerineqartumi 1. juli 2002-mit atuutilersumik meeqqat atuarfianni
sunngiffimmi sammisassaqtitsineq pillugu nalunaarut nr. 14, 29. maj 1995-
imeersoq atorunnaarsinneqarpoq. Aamma piffissami tassani nalunaarutip
atuutsinneqarnissaanut maannamut inatsisitigut tunngavigineqartoq
atorunnaarsinneqarpoq. Tassani pineqarpoq meeqqat atuarfiat pillugu inatsisartut
peqqussutaanni nr. 1-imi, 6. juni 1997-meersumi § 4. Tamatumani
tunngavigineqarpoq sunngiffimmi sammisassaqtitsineq pillugu inatsisartut
peqqussutaata nutaap aammattaaq 1. juli 2002-mi atuutilerana.

Meeqqat atuarfiat pillugu peqqussutip nutaap atuutilerfissaanut piffissap 1. august
2002-mit, pilersaarutaagaluarsimasumit, 1. august 2003-mut kinguartinneqarnerata
kingunerisaanik nalunaarut taaneqartoq 1. august 2003-p tungaanut

atuutiinnarsimassagalarpoq. Taamaalilluni sunngiffimmi sammisassaqtitsineq pillugu inatsisartut peqqussutissaattut siunnersuummi pisariaqartinneqartumik kingunerisassat pillugit iluarsiiisuteqartoqarsimannginnera kukkuneruvoq, aammalu nalunaarut taamaalilluni 1. juli 2002-mi atorunnaarsinneqareerluni. Aammattaaq meeqqat atuarfiat pillugu peqqussummi akuerineqartumi nalunaarutip maannamut atuuttup imarisaata assinganik imalimmik nalunaarummik atuutsitsilernissamut inatsisitigut tunngavissaqanngimmat, tamatumunnga periarfissaqalernissamut inatsisitigut tunngavigisat pillugit aalajangersakkamik nutaamik ilanngussinissaq pisariaqarpoq. Tamatuma kingorna nutaamik nalunaarusiortoqassaaq 1. august 2003-p tungaanut atuuttussamik.

Allaffissornikkut aningaasaqarnikkullu kingunerisassat:

Siunnersuut allaffissornikkut aningaasaqarnikkullu kinguneqassanngilaq.

Tusarniaaneq:

Taamaallaat kukkunerit marlussuit pineqarmata siunnersuut tusarniaassutigineqarsimanngilaq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Aalajangersagaq aqqissugaanermigut allannguutitaqarluni meeqqat atuarfiat pillugu inatsisartut peqqussutaanni nr. 1-imi, 6. juni 1997-imeersumi § 4-mut naapertuuppoq.

Aalajangersagaq atorlugu meeqqat atuarfiata sunngiffimmi atuartitsinissaanut naalakkersuisut malittarisassiornissamut inatsisitigut tunngavissinneqarput. Sunngiffik imatut paasillugu piffissaq atuartitsinerup avataaniittoq.

Nr. 2-mut

Aalajangersagaq atorlugu atuartup atuartitsinermi pissarsiaqarnerata naliliiffiginissaa pillugu naalakkersuisut malittarisassiornissaannut inatsisitigut tunngavissinneqarput. Naliliineq taanna ilaatigut ingerlaavartumik naliliinerup inernerinik ilaatigullu atuartup atuartitsissutini tamani inissisimanera pillugu naliliinermik tunngaveqassaaq. Atuartitsissutini atuartup piginnaanertigut inissisimanerata nalilerneqarnera ataatsimut piumasaqaatit naalakkersuisunit aalajangersarneqartut

aallaavigalugit ingerlanneqassapput. Perorsaanermut Institutti piginnaanertigut naliliinernit inernerit ingerlaavartumik katersussavai misissoqqissaarlugillu, aammalu tamatumunnga atasumik ilinniartitsissutitut toqqarneqartunut ukiut tamaasa naliliinissamut immikkut atortussanik nassitsisassalluni. Ilinniartitsissutini tamani atuartup inissisimaneranik inaarutaasumik naliliinerit meeqqat atuarfianni maanna misilitsinnernut taarsiullugit atuutilissapput. Naatsorsuutigineqarpoq oqaluttariarsornermik allattariarsornermillu misilitsinnerit suli atorneqassasut, pingaartumik inissisimanermik naliliinerni. Naalakkersuisut periaatsit sorliit atorneqassanersut pillugit erseqqinnerusumik malittarisassiussapput.

§ 2-mut

Piffissaq atortuulerfissaa allannguutit sapinngisamik piaartumik atuutilernissaat siunertaralugu aalajangersarneqarpoq.

§ 1, nr. 1-ip piffissamut atuutilerfissaanut atatillugu tamanna 1. julimut aalajangersarneqarpoq, meeqqat atuarfianni sunngiffimmi sammisassaqaqtitsineq pillugu nalunaarutissap piffissap taassuma tungaanut kingumut atuuttumik atuunnissaa pillugu, taamaalilluni meeqqat atuarfianni sunngiffimmi sammisassaqaqtitsinerup malittarisassat maannamut atuuttut naapertorlugit atuutilernissaa pillugu.